

# Nataal

Una oeulta.....  
apèna pasàa l'estaa,  
la genti la cuminceva  
a cuntàa i dii  
dal Natal ca dueva vignii.  
E dopu tantu spiciàa  
finalment al riveva  
.....  
e cusée c'al purteva?

La gèera in su i stràa,  
mez metar da née,  
i curbatt in di pràa.  
Un presepi da carta  
incolàa c'un farina,  
una pigota da péssa,  
un cavalin da legn,  
una brancàa da pomm  
cumpràa a la Culurina.

Sa tirevan proo tuti,  
fradii, fiô, surej e cugnaa;  
parfina la suocera a l'eva invidàa  
c'ul caan, la gata e 'l canariin.  
In puu, vulantera  
ga sa deva una maan  
a quela pora vegia  
ca ga steva visin.

Un piatt da risott,  
un tocc da capuun,  
un bicer da vasell  
al ga manca a nisuu.  
In fond al camin  
al feva scintill  
un groogn da muroon.  
Che paas!  
E foora al frecc l'eva raas.

*Pugiàa a la gesa  
ghe là un puarett  
al ga nanca 'l tabarr,  
al ga rott i culsett.  
Fiiô, pusée povar d'insci  
da sicur vegnum no,  
andée là a dumandal  
e feel satagiò.*

*Al mangia un bucoon,  
ga trema la maan,  
ga vegn al magoon,  
ga lusiss i ogii,  
ga vegn giò un gutoon  
c'al vè a benedì al panatoon.*

A.B.